

13 OCT 2003

Mahathir-Lukisan

DR MAHATHIR LANCAR PAMERAN LUKISAN "EXPRESSIONS OF PUTRAJAYA"

PUTRAJAYA, 13 Okt (Bernama) -- Perdana Menteri Datuk Seri Dr Mahathir Mohamad di sini, hari ini, melancarkan satu pameran lukisan mengenai bangunan, tanah lembap serta flora dan fauna di Putrajaya.

Pameran itu yang bertema "Expressions of Putrajaya" menampilkan 30 hasil nukilan tujuh orang pelukis yang kesemuanya adalah pensyarah Universiti Teknologi Mara (UiTM).

Pameran itu yang dianjurkan oleh Putrajaya Holdings Sdn Bhd, pemaju utama pusat pentadbiran kerajaan itu akan dibuka bagi orang ramai bermula esok hingga 26 Oktober.

Di majlis pelancaran itu, Perdana Menteri dihadiahkan dua buah buku masing-masing bertajuk "The Making of Putrajaya - The Developers's Perspective (1995-2002)" dan "Bridges of Putrajaya", yang diterbitkan oleh pemaju pusat pentadbiran kerajaan persekutuan itu.

Semasa bercakap di majlis pelancaran, pengerusi Putrajaya Holdings Datuk Mohd Hashim Hassan berkata buku pertama itu meninjau pembangunan bandaraya bertaraf dunia itu dari 1995 hingga 2002, sementara yang kedua memaparkan lapan jambatan mercutanda di bandaraya itu.

Beliau juga berkata, kejayaan Putrajaya pada amnya menunjukkan keupayaan negara pada keseluruhannya.

Putrajaya bukan sahaja pusat pentadbiran baru Malaysia tetapi juga menunjukkan kreativiti, teknologi, budaya dan warisan serta kekayaan semulajadi Malaysia," katanya.

Mohd Hashim berkata, Putrajaya lahir daripada wawasan Dr Mahathir.

-- BERNAMA

RIZ PR